

Sudah tiba masa rakyat biasa pula menjadi 'frontliners'

Astro Awani

20 Julai 2020

Ridauddin Daud,

KUALA LUMPUR: Sudah tiba masa untuk rakyat Malaysia menjadi barisan hadapan dan bukan hanya mengharapkan pihak berkuasa semata-mata dalam usaha membendung penularan COVID-19.

Pengerusi Ikatan Komuniti Selamat, Tan Sri Lee Lam Thye berkata, rakyat boleh memainkan peranan itu dengan mematuhi semua prosedur operasi standard (SOP) ditetapkan kerajaan.

Bagaimanapun beliau bimbang kerana berpendapat masyarakat belum memahami dengan mendalam mengenai tanggungjawab masing-masing bersama pihak berkuasa dalam memerangi virus tersebut.

“Dalam soal pematuhan, kalau masyarakat tak ubah sikap dan rasa tak perlu ambil berat... anggap keadaan tidak serius, semuanya bawah kawalan... lama-kelamaan ini tentu akan menimbulkan satu masalah besar untuk negara kita,” katanya dalam temu bual Skype bersama Astro AWANI pada Isnin.

Mengulas peningkatan kes dalam beberapa hari lepas, Lam Thye berkata ia mungkin berlaku kerana rakyat sudah sampai pada tahap selesa, maka mereka tidak lagi mematuhi SOP dengan bersungguh-sungguh.

“Saya rasa rakyat di Malaysia terutamanya masyarakat kita pada peringkat permulaan telah beri banyak kerjasama, mereka usaha bersama dengan KKM (Kementerian Kesihatan), memastikan bahawa SOP diikuti, dipatuhi.

“Tapi nampaknya apabila mereka mendapat tahu bahawa trend wabak itu menurun, jadi mereka rasa boleh lega dan saya fikir ini boleh menjadi punca masalah (peningkatan kes),” ujarnya.

Tambahnya, sekiranya Malaysia tidak berwaspada, tidak mustahil boleh wujud gelombang seterusnya di negara ini seperti yang berlaku di Australia, Korea Selatan dan Jepun.

Kerajaan hari ini menzahirkan kebimbangan terhadap penularan COVID-19 di negara ini selepas 13 kluster baharu dikesan sepanjang tempoh pelaksanaan Perintah Kawalan Pergerakan Pemulihan (PKPP).

Perdana Menteri, Tan Sri Muhyiddin Yassin berkata, kes positif di negara ini juga kembali mencatatkan angka dua digit sejak beberapa hari lalu.

Justeru itu, beliau menasihatkan rakyat agar tidak mengambil mudah isu berkenaan bagi mengelakkan kerajaan melakukan tindakan lebih tegas termasuk melaksanakan sekatan pergerakan yang lebih ketat sekali lagi.

Malaysia masih mencatatkan peningkatan dua digit bagi kes baharu COVID-19 dengan 21 kes dilaporkan setakat 12 tengah hari Isnin menjadikan jumlah kumulatif kes positif di negara ini sebanyak 8,800 kes.

Menurut Ketua Pengarah Kesihatan, Datuk Dr Noor Hisham, daripada 21 kes baharu yang dilaporkan, 15 adalah kes penularan dalam negara.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/sudah-tiba-masa-rakyat-biasa-pula-menjadi-frontliners-252016>